

## **Høyringsuttale frå Skulegruppa for vidareføring av Kløvheim Skule i samband med «Kommunedelplan for skule 2014-2018 Framlegg til planprogram»**

Skulegruppa for vidareføring av Kløvheim skule registrerer at Kommunen sjølv har valgt å avgrense denne høyringsuttalen til å gjelde Lindås og Ostereidet Ungdomsskulekrins. I samband med dette, har vi nokre innspel i forhold til mogleg løysing for dei økonomiske utfordringane kommunen har for å spare pengar på skulestrukturen i desse områda:

Etter kva vi har forstått, er det framleis Norconsultrapporten frå 2009 som skal liggje i botnen når Rådmann Ørjan Raknes Forthun skal utarbeide eit framlegg til ny skulestruktur for Lindås Kommune.

Frå rapporten vart laga, har ein ved Kløvheim skule fått utbetra fleire sentrale punkt, som gjer at vedlikehaldskostnadane ved å halde fram drift ved skulen er vesentleg mindre. Dette gjelder m.a.:

- Vindauga er skifta på heile fasaden 2002/2003
- Handicaptalett og elevtoalett vart pussa opp i 2005- 2006
- Tak er skifta juni 2010
- Garderobar tilknytt gymnastikksal er pussa opp i 2014 .

### **Økonomi vedkomande drift:**

Skulane Myking, Kløvheim og Eikanger ligg alle langs fv 397 mellom dei to skulesentra Lindås og Ostereidet. Kløvheim er den skulen som ligg i midten med om lag 20 kilometer i avstand til begge sentra.

Kløvheim har den minste skulekrinsen i areal, der elevane har gangavstand til skulen. Skulen har gode lokalitetar og plass til fleire elevar.

Myking ligg lengst nord av desse skulane omlag 6 kilometer nord for Kløvheim, men knytt til Lindås Ungdomsskulekrins. Myking har i areal den største krinsen av desse skulane, der mange av elevane tek buss heilt frå Vabø som ligg nord i krinsen til skulen som ligg heilt sør i same skulekrins.

Eikanger skule ligg lengst sør av desse skulane, om lag 7 kilometer sør for Kløvheim, om lag 8km til Leiknes og om lag 10km til Ostereidet.

Når vi no kjem med innspel, er det for å peike på at vi ser at det er ei utfordring å drifte alle desse skulane. Samstundes meiner vi at det bør vere minst ein skule på denne strekninga som er om lag 40 km lang frå det eine skulesentra til det andre.

Jfr vedlegg til Kommunedelplan for skule 2010- 2020 s. 19 under samla vurdering står det:

*«Alt i alt er læringsareala på Eikanger skule nedslitne».*

Eikanger skule har fått paviljong etter Norconsultrapporten vart laga for å dekkje inn behov for større plass. Kostnader for tilrettelegging av dei to klasseromma som ein finn i paviljongen har kosta fleire millionar. Det er viktig å merke seg at paviljongen er leigd, og at ein ved vidare drift der må ta inn over seg at det vil komme ein ytterligere kostnad der innan ein 2 års periode når kommunen anten må kjøpa ut paviljongen, evt returnere den. Skal kommunen kjøpa, er det ikkje i tråd med at kommunen skal spare pengar. Vidare veit ein at der er kapasitet ved fleire andre skular få kilometer unna.

**Å fordela elevane ved Eikanger skule på hhv Ostereidet og Kløvheim og på denne måten utnytta godkjent undervisningsareal utan å måtta investera i nybygg vil utan tvil gje kommunen den beste driftsinnsparinga. Korkje Kløvheim eller Ostereidet har pr. i dag plass til Eikanger sine elevar åleine, det er derfor naudsynt å fordela på to skular for å unngå auka investeringar og gje eit dårlegare tilbod enn i dag.**

For elevane på Eikanger saman med dei om lag 120 elevane på Ostereidet Barneskule, vil ein samlokalisering for heile Eikanger Skule og Ostereidet Barneskule på Ostereidet føre til at ein er nøydd til å utvide( byggje nytt). Skal Kløvheim og sendast til Ostereidet, vil ein utbygging tilsvarande nye Seim Skule tvinga seg gjennom, og det er heller ikkje i tråd med at kommunen skal spare pengar.

Kløvheim Skule har i dag om lag 40 elevar. I dag er skulen tredelt. På skulen er det ledig kapasitet, og tal frå rapporten seier at der er rom for å ta imot ein del elevar utan at det treng store utbetringar. Skulebygningen er i god stand, og der er eit stort uteområde. Om kommunen vel å tilføre eit tal elevar, vil ikkje uteområdet på skulen bli råka. Det er viktig med tanke på kva tilbod elevane pr.

i dag har, som ingen ynskjer skal bli dårlegare. I så måte er ein samlokalisering på Kløvheim Skule et alternativ som gjev kommunen rom for å spare pengar.

Myking skule ligg i dag på om lag 60 elevar. Dei soknar til Lindås Ungdomsskulekrins. Kommunen må ta stilling til om dei framleis ynskjer at dei skal sokne til Lindås, eller om ein del av den geografisk store krinsen i staden skal sokne til Ostereidet Ungdomsskulekrins. På Lindås Barneskule vil det frå hausten 2015 vere stor kapasitet til å ta imot alle Mykingelevane, som gjev rom for innsparing.

### **Framlegg til ulike løysingar:**

Ungdomsskulekrinsgrensane står uendra.

Lindås Barneskule er snart ferdig rehabilitert. Då vil vere fornuftig å utnytte ledig kapasitet ved skulen. Alle elevar ved noverande Myking Skule held fram som elevar ved Lindås Ungdomsskule, men med ny barneskule: Lindås Barneskule framfor å halde fram drift på Myking skule.

Ungdomsskulekrinsgrensane vert justert noko. Noverande Ostereidet Ungdomsskulekrins vert strekt nordover til å gjelde heile Mykingvegen. Elevane på sjølve Myking må ta ei avgjerd om dei vil halde fram som elevar i Lindås Ungdomsskulekrins, eller dei vil bli elevar i Ostereidet Ungdomsskulekrins. Kløvheim Skule får endra opptaksområde til å gjelde heile Mykingvegen ( frå E39 ved Vahaugen bustadfelt, og nordover. Heggertveit og Kolås ligg avstandsmessig nærare Kløvheim enn Leiknes, og bør difor vurderast inn i Kløvheimkrinsen.

Elevar i noverande Eikanger skulekrins som bur på Eidsnes, vil geografisk ha korta veg til Ostereidet enn Kløvheim, og naturleg nok vil dei kjenne tilknytning der. Elevar som bur på Fyllingsnes, vil kunne velje Leiknes/ Ostereidet/ Kløvheim. I hovudsak vil dei moglegvis ha kortare avstand til Leiknes. Om der er kapasitetsproblem, vil dei måtte velje mellom Ostereidet/ Kløvheim. Alle skal til sjuande og sist til Ostereidet på ungdomsskulen.

Justering av noverande krinsgrenser bør ein sjå nærare på. Kløvheim er i dag den minste skulekrinsen i areal, men med størst uteareal og mest vedlikehaldsfri bygningsmasse. Skulen har ein del ledig kapasitet. Ein moglegheit vil vere å flytte noverande krinsgrense nordover til å gjelde heile

Mykingvegen til Myking Handel, og sørover t.o.m. Vahaugen bustadfelt som grensar til E 39 som naturlige skilje for busstransport. Samstundes ivaretek ein kjerna som har gangavstand til skulen.

Lindås Kommune har fleire stader skulebygningen liggjande i enden av skulekrinsane. Ved å endra opptaksområda, vil ein for skulane Myking, Kløvheim og Eikanger kunne få ein skule liggjande i midten. Det vil gje ein meir «rettferdig» fordeling av reiseveg. Som kommune bør administrasjonen ta innover seg at mange av dei som bur i området har arbeidet sitt knytt til Mongstad. For dei som bur frå Eikanger og nordover, vil ein samlokalisering på Kløvheim kunne gje eit stort lette for henting/ levering til SFO. Det er eit viktig tenestetilbod som kommunen gjev til innbyggjarane sine, som ein ikkje ynskjer skal verte dårlegare. For dei elevane som nyttar SFO vil ein samlokalisering lenger sør t.d. Eikanger/ Ostereidet gje dei særst lange dagar på skulen då foreldra først må køyre til Ostereidet for å køyre heilt tilbake til t.d. Mongstad på jobb. For mange av dei minste elevane vil dette utgjere om lag 1 klokke time kvar dag i «meirtid» på skulen. Kommunen vil måtte utvide opningstidene på SFO, og dei elevane som nyttar SFO vil få eit dårlegare skuletilbud enn dei i dag har.

## **Konklusjon**

**Kløvheim skulegruppe vil understreka at Norconsultrapporten sin hovud anbefaling for å gje den beste økonomiske og kvalitative løysinga var å bruka skulen på Kløvheim til samlokalisering av krinsane Myking, Eikanger og Kløvheim. Slik er framleis situasjonen, men med betre tal då skulen på Kløvheim pr. i dag har lågare vedlikehaldsutgifter enn kva som står i rapporten, (fleire av punkta under grunnlaget for estimering av utgifter er no utbetra). Viser til Norconsult sin anbefaling som er gjengitt i kommunedelplanen skule 2010-2020 side 5:**

***«etter ei grundig fagleg og økonomisk avvegning, rår konsulenten til at framtidig skulestruktur i Lindås kommune følgjer alternativ B1a for barnesteget.»***

Med helsing

Skulegruppa for vidareføring av Kløvheim Skule

Hege Bårdsen

